

# Parc Adula – las reacziuns

■ (rtr) **Durant emnas han las discussiuns davart il project dal Parc Adula levantà bleras emeziuns, ed era las uras suenter il cler na eran ils blers dumandads persvadids da lur posiziun.** Uss hajan els in bun sentiment, els hajan puspè ditg tge ch'els veglian. Uschia hai tunà la dumengia cunter saira a Rabius, cura ch'in auto cun adversaris dal parc è arrivà da Vrin. A Rabius è numnadamain sa rimnads ils adversaris per ina festa. I tanschia da savair ch'els abiteschian en ina bella cuntrada, ha manegià in auter um. E blers dals preschents han discurrì da la libertad che saja spendrada.

En il Mesauc è la gliued era stada surstada dal resultat davart il project Parc Adula, dentant per part èni trumpads. I saja in di fitg trist per la Mesolcina, per il Grischun e per la Svizra, ha manegià in um. Cuntrari hai tunà en in'ustaria, la democrazia haja gudagnà, e suenter diesch onns na fiss nagut sa midà sco empermess dals responsabels dal parc.

## La Pro Natura deplorescha

La Pro Natura ha sustegnì l'idea per in segund parc naziunal. Per las regiuns che hajan ditg na saja uss difficil da chattar sumegliants projects cun la medema paisa, quai manegia la presidenta da la Pro Natura, *Silva Semadeni*. Per la Pro Natura saja adina stà cler che las vischnancas decidian sch'il Parc Adula vegnia realisà u betg. Quai ha ditg Semadeni a Radiotelevisiun Svizra Rumantscha. Tenor Semadeni han las vischnancas che han decidì davart il Parc Adula manchentà ina schanza. Ed alternativs na sajan betg en vista. En connex cun il Parc Adula saja adina puspè sa mussada la tema da leschas, scumonds e controllas, ha manegià la presidenta da la Pro Natura. Schizunt da polemica discurra ella, en connex cun las ovras idraulicas da Zervreila ch'avevan pretendì da stuair far giu il mir da fermada. Enstagl da sa decider per la furma d'in parc naziunal datti era l'alternativa da crear insatge pli pitschen sco in parc regional. En il Grischun dettia dentant gia trais

parcs regional, ha fatg attent Semadeni. I fiss dentant tenor ella ina via pussaivla per las vischnancas da las valladas talianas dal Grischun che han ditg gea al project Parc Adula.

## Partidas inactivas en il cumbat Parc Adula

Era la pli ferma partida en Surselva, la Partida cristiandemocratica, n'ha betg prendì uffizialmain posiziun en chaussa. Las opiniuns entaifer la partida eran memia differentas. Auters motivs per la passivitat en il cumbat dat igl tar la ps. La pps perencunter pudess profitar. Els han gi entaifer la regiun fitg differentas opiniuns pertutgant il Parc Adula, di *Kevin Brunold*, il president da la pcd Surselva. Plinavant ha gi mo ina part dals commembers la pussaivladad da votar. Uschia hajan els decidì da betg prender ina parola uffiziala. Tut auters èn ils motivs tar la Partida socialdemocratica. Els n'hajan sco secziun da partida betg ina gronda organizaziun, di *Hans Caprez* da la ps Surselva. El avessia sez stuì vegnir activ e scriver, quai haja el manchentà. Per ina n'haja el betg vuli sa maschadar en questa campagna disgustosa, per l'autra n'haja el betg vuli vegnir en ils chavels cun dus poets sursilvans. Fitg activ en la campagna cunter il Parc Adula è stà il president da la pps Surselva, *Pablo Maissen*. Quai dentant sco persuna privata, accentuescha Maissen. Ma la partida possia ussa profitar e quai en l'entir Grischun. La populaziun haja vesi ch'ils commembers da la pps n'hajan betg tema dad era prender en maun temas fitg delicats.



Ina giada betg las partidas che han pendì si placats dapertut. Quellas èn stadas inactivas en il cumbat da votaziuns pro u contra il Parc Adula.